

REGLUR

um félagsheimilið Sævang.

108

10. júní

1. gr.

Nafn félagsheimilisins er Sævangur í Kirkjubólshreppi, Strandasýslu.

Lóðin er eignarlóð.

Lóðarstærð er 5400 fermetrar.

Eigendur félagsheimilisins eru:

Kvenfélagið Björk, Kirkjubólshreppi,

Ungmennafélagið Hvöt, Kirkjubólshreppi,

Lestrarfélag Kirkjubólshrepps,

Kirkjubólshreppur.

2. gr.

Húsnefnd, kjörin árlega, stjórnar félagsheimilinu. Hún er þannig skipuð að hreppsnefnd kýs einn fulltrúa og hvert hinna félaganna kýs einn fulltrúa hvert. Stjórnir félaganna kjósa oddamann á aðalfundi. Varamenn skulu kosnir á sama hátt.

Sé sami maður í stjórn tveggja eða fleiri féлага, hefur hann aðeins atkvæðisrétt fyrir eitt félag, og taki þá varamenn hans í hinu eða hinum félögunum, er hann er í stjórn fyrir, sæti á aðalfundi.

Oddamaður skal boða til fyrsta fundar í húsnefnd ár hvert.

Húsnefnd skiptir sjálf með sér verkum. Hún skal halda nákvæma gerðabók um störf sín. Ef félagsheimilið hættir störfum, skal afhenda Þjóðskjalasafni gerðabækur þess til vörzlu.

3. gr.

Húsnefnd heldur fund er þurfa þykir. Skylt er henni að halda fund ef $\frac{1}{3}$ nefndarmanna æskja.

Aðalfundur eigenda félagsheimilis skal vera ár hvert. Skulu þangað kvaddir með hæfilegum fyrirvara stjórnendur allra þeirra féлага, sem eru eigendur félagsheimilis. Á fundinum skal húsnefndin leggja fram rekstrar- og efnahagsreikning félagsheimilisins fyrir síðastliðið ár, endurskoðaða af endurskoðendum sveitarsjóðsreikninga eða löggiltum endurskoðanda. Einnig leggur hún fyrir fundinn fjárhagsáætlun fyrir félagsheimilið á yfirstandandi ári.

Fjárhagsáætlunin skal gerð svo nákvæm sem unnt er. Eigi má efna til verulegra útgjalda, nema samþykkt hafi verið á aðalfundi eða aukafundi sömu aðila og sæti eiga á aðalfundi. Gildir þetta jafnt um rekstrargjöld og stofnkostnað.

Reikninga og fjárhagsáætlun skal bera undir atkvæði fundarmanna. Húsnefndarmenn hafa hver um sig eitt atkvæði á aðalfundi og hver félagsstjórn þrjú atkvæði.

Félagsstjórnir skýra frá því á aðalfundi, hvern þær hafa valið af sinni hálfu í húsnefnd næsta ár.

Afrit af ársreikningum félagsheimilisins skal senda félagsheimilásjóði.

Félagsheimilið skal rekið sem sjálfstæð stofnun með sérstöku reikningshaldi. Almanaksárið skal vera reikningsár þess.

4. gr.

Aðalverkefni húsnefndar eru:

- a. að ráða húsvörð, þar sem þess er þörf að dómi aðalfundar, setja honum starfsreglur og sjá um, að þeim sé fylgt;
- b. að ráða annað starfsfólk, ef aðalfundur telur nauðsynlegt. Leita skal umsagnar húsvarðar um ráðningu starfsfólks, sem á að vinna undir hans stjórn;

- 108** c. að ráðstafa félagsheimilinu til afnota fyrir eigendur og aðra;
 10. júní d. að ákveða gjöld fyrir afnot hússins;
 e. að annast kaup nauðsynlegra tækja og áhalda;
 f. að sjá um viðhald og endurbætur húseignar, húsbúnaðar og áhalda;
 g. að sjá um, að ræsting félagsheimilisins (húss og lóðar) sé jafnan í góðu lagi og að gætt sé ýtrasta hreinlætis í umgengni;
 h. að sjá um, að húsið sé hæfilega hitað og lýst;
 i. að sjá um, að löggæzla sé á samkomum, ef þess er þörf.

5. gr.

Eigendur félagsheimilisins skulu, sem aðrir, greiða leigu fyrir afnot hússins.

Skylt er þeim að heimila félögum, er greinir í 1. gr. laga nr. 77 1947, svo og breytingu á þeim lögum frá 29. maí 1957, um félagsheimili, innan sama byggðarlags afnot af húsinu gegn hæfilegu gjaldi, ef eigi fer í hága við eðlilega þörf eigenda sjálfra fyrir húsið. Verði ágreiningur um, hvort slíkt félag eigi rétt á afnotum af félagsheimili, sker fræðslumálastjóri úr. Úrskurði hans má skjóta til menntamála-ráðuneytisins.

6. gr.

Leiga fyrir afnot félagsheimilisins skal ákveðin svo há, að nægilegt fé fái til þess að inna af höndum nauðsynleg gjöld, ef stofnuninni koma eigi aðrar tekjur.

7. gr.

Þess skal gætt, að húseignir, áhöld, húsbúnaður allur og fatnaður sé jafnan hæfilega vátryggt.

8. gr.

Félag, er samkomu heldur í félagsheimilinu, skal hafa þar gæzlumann af sinni hálfu. Ef húsvörður er enginn eða eigi við, þegar samkomu lýkur, skal gæzlumaður slökkva ljós, ganga örugglega frá hitunartækjum, opna loftræstingarop, koma húsbúnaði og áhöldum á sinn stað, koma óskilamunum í örugga vörzlu og loks loka vel gluggum og hurðum.

9. gr.

Að lokinni hverri notkun félagsheimilisins skal húsvörður eða húsnefnd sjá um ræstingu þess, þ. á m. að gólf séu þvegin úr sápuvatni, salerni hreinsuð vandlega með sótthreinsandi efni og fatageymslur, bað- og búningsherbergi ræst.

Árlega skal fara fram gagnger ræsting alls hússins.

10. gr.

Ganga skal þannig frá lóðinni umhverfis félagsheimilið, að auðvelt sé að halda henni snyrtilegri, og skal húsvörður eða húsnefnd sjá um, að hún sé jafnan vel hirt. Lóðina skal girða traustri, gripheldri girðingu, er haldið sé vel við.

Hestagirðing og/eða bifreiðastæði skal vera í námunda við félagsheimilið, ef því verður við komið.

11. gr.

Fánastöng skal koma fyrir á húsinu eða við það. Hún skal vera traustlega fest og máluð hvít. Húnn og snerill mega þó vera í öðrum lit. Fánasnúran skal ávallt vera heil. Stöngin skal vera í tveim hlutum, þannig að auðvelt sé að fella hana, t. d. ef skipta þarf um snúru eða mála stöngina. Þess skal vandlega gætt að nota einungis fána með réttum litum og hlutföllum.

12. gr.

108

Árlega skal athuga húseignina alla vandlega með viðgerð fyrir augum. Einkum skal athuga: múrhúðun, þak, þakrennur, niðurföll, hurðir, dyraumbúnað, glugga (utan og innan), málningu, gólfduka, klæðningu veggja, hreinlætistöki, eldavél og hitunartæki, raflagnir og ljósatæki, vatnslögn og krana, gluggatjöld, gólf í samkomusal o. s. frv.

13. gr.

Skemmdir á húseign, áhöldum og húsbúnaði umfram eðlilegt slit skulu þeir bæta, er spjöllum valda.

14. gr.

Í félagsheimilinu má hvorki veita áfengi né neyta þess. Húsnefnd getur svipt þá, er gegn þessu brjóta, aðgangi að félagsheimilinu tiltekinn tíma.

15. gr.

Reglur þessar, sem settar eru með skírskotun til 8. gr. laga nr. 77 5. júní 1947, um félagsheimili, öðlast gildi þegar menntamálaráðuneytið hefur staðfest þær.

Framanritaðar reglur staðfestast hér með.

Í menntamálaráðuneytinu, 10. júní 1960.

F. h. r.

Ásgeir Pétursson.

Knútur Hallsson.

REGLUR

109

um félagsheimilið Valhöll á Eskifirði.

10. júní

1. gr.

Nafn félagsheimilisins er Félagsheimilið Valhöll í Eskifjarðarhreppi, Suður-Múlasýslu.

Lóðin er afhent félagsheimilinu endurgjaldslaust af Eskifjarðarhreppi. Lóðarstærð er 2024 m².

Eigendur félagsheimilisins eru samtök eftirgreindra félaga í Eskifjarðarhreppi: Ungmennafélagið Austri, Kvenfélagið Döggin, Verkamannafélagið Árvakur, Slysavarnadeildin Brimrún, Slysavarnadeildin Hafrún, Kvenréttindafélag Eskifjarðar, Sjómannadagsráð Eskifjarðar og Eskifjarðarhreppur.

2. gr.

Húsnefnd, kjörin árlega, stjórnar félagsheimilinu. Hún er skipuð 5 mönnum kjörnum á aðalfundi eigendafélagsins. 3 varamenn skulu kjörnir á sama hátt. Húsnefnd skiptir sjálf með sér verkum. Hún skal halda nákvæma gerðabók um störf sín. Ef félagsheimilið hættir störfum, skal afhenda þjóðskjalaverði gerðabækur þess til vörzlu.

3. gr.

Húsnefnd heldur fundi er þurfa þykir. Skylt er henni að halda fund, ef $\frac{2}{3}$ nefndarmanna æskja.